

Svečano otvoren "Zdrušeni napor 2009"

03/09/2009 20:43 by Administrator

U Kasarni "Kozara" u Banjaluci danas je svečano otvorena vježba NATO-a i Oružanih snaga BiH "Zdrušeni napor 2009, a koja će trajati do 17.septembra. Cilj vježbe je testiranje interoperabilnosti i kompatibilnosti telekomunikacijskih sistema zemalja članica NATO i Partnerstva za mir, a učestvuje oko 500 vojnika iz 16 zemalja NATO-a i oko 150 pripadnika OS BiH.

Američki vojni atašé Michael Schleicher kazao je da su pripreme za ovaj događaj veliki uspjeh Oružanih snaga BiH i veliki indikator njihovog profesionalizma. Ocijenio je da, pored vojnog dijela vježbe, ovaj događaj ima za cilj da razvije prijateljstva i partnerske odnose a vojski različitih zemalja. - SAD su ponosne na vaš rad i rad Oružanih snaga BiH. Mi se radujemo vašoj kontinuiranoj saradnji koja će pomoći da ovdje razvijete vojne snage koje su sposobne za susrete sa izazovima u 21.vijeku - rekao je Schleicher. Glavni rukovodioc Tima za pripremu vježbe, brigadni general Dragan Vuković rekao je da vježba ima svoju specifičnu težinu, koja se ogleda u sticanju komunikacijskih znanja, ali i prijateljstva. - Uvjereni smo da izvođenje ove vježbe svima nama daje mogućnost da se bolje upoznamo, da zajedno radimo kao vojnici i da možemo da rješavamo sve zadatke koji se pred nas postave - rekao je Vuković. Dodao je da očekuje velike efekte od vježbe po svim pitanjima. - Po vojnim pitanjima, očekujemo edukaciju, upoznavanje vaših vojnika sa savremenim komunikacijskim tokovima. Očekujemo da će se stvoriti jedna pozitivna slika o ovom prostoru i nama kao domaćinima, a očekujemo i finansijsku dobit, jer će se vojnici kretati po gradu i koristi usluge grada - kazao je Vuković. Vježba, koja će koštati oko 6,2 miliona KM, je prva vježba NATO-a u zemlji koja nije njegov član. Od 6,2 miliona KM, gotovo četiri miliona KM odnosi na investiciona ulaganja koja će ostati u Kasarni "Kozara". Kompletna vježba će se odvijati na lokaciji kasarne, a istovremeno će se održavati i u Danskoj i Nizozemskoj, gdje će, također, biti smješten dio snaga iz NATO-a i članica Partnerstva za mir. Za potrebe vježbe urađeni su radovi na infrastrukturi koja je podrazumijevala uređenje, adaptaciju i ponovnu izgradnju 22 objekta. Autor: ONASA

Izvor vijesti: Dnevni Avaz